

Olga Orman pone Compa Nanzi pica hopi mucha cu risa



ORANJESTAD(AAN)--- Den cuadro di e ciclo riba cuentanan di Compa Nanzi, actualmente ta na Aruba e escritora arubiano, residencia na Hulanda, ex maestra di school actualmente cu pension, y contador excelente di cuentonan principalmente di loke ta e araña "Compa Nanzi.

E dianan aki ta cantidad di mucha a wordo pica pa hazañanan di Compa Nanzi,

ya cu Olga ta contando storianan na Biblioteca y awe tardi un biaha mas, mientras cu ta ser traha riba e bibliobus cu ilustracionnan di Nanzi for di buki di Olga.

Olga Orman a cumenza interesa su mes den cuentonan di Nanzi for di chiquito y tabata na ocasion di resamento di "ocho dia". Na momento di partimento di chuculati pinda, e hombernan tabata conta charada y den esaki tambe ta bin dilanti e cuentonan di nanzi.

Despues el a scucha e cuentonan di Nilda Pinto na Radio, bay Hulanda, bolbe y ricibi un buki di cuentanan di Nanzi di Nildo Pinto, como regalo di su mama.

Despues cu el a bolbe Hulanda, el a haya su mes na Bijlmer caminda e tabata conta e cuentonan di Nanzi na muchanan surinameo.

E maestra di school a cuminsa haya les di e muchanan cu tabata mustre cu ta B'Anasi, y aki su interes pa haya sa mas di Nanzi. B'Anansi, Ananzi, Ananse a crece.

El a cumenza studia e historia aki mientras cu e ta conta cuenta, y ademas di skirbi articulonan educativo y otro tipo di literatura, el a presenta tambe 2 buki di prechi cu cuentanan di Compa Nanzi.

E prome tabata "Con Anansi a habri wowo di Shon Arey" y e di dos "Con Anansi a gana festival di Tumba" tur dos cu titulo na hulandes.

Olga a cumenza usa e metodo di teatro di cuento hapones, "Kamishibai" durante su sesionnan di conta cuenta. Esaki ta e metodo di muestra plachinan na momento di ta contra e cuenta, locual a bira masha atractivo pa mucha.

Olga a cumenza haci mas estudio riba e figura di Nansi y a yega asina leu cu mescos cu hopi autor di Nanzi rond mundo, a cumenza conta cuentanan tambe di e araña pero den e periodo moderno aki. Den Caribe mes riba varios isla e cuentanan nobo di Nansi ta basa hopi riba e tempo moderno y actualidad, pero Nanzi ta keda e mes Nanzi. Ora Olga conta, e ta trece esaki cu un energia cu ta keda mantene interes di esnan cu ta scuchando, y e ta biba cu e cuenta cu movecionnan di henter su curpa logrando cu e muchanan ta goza di locual nan ta scucha y mira.

Ta manera e mes ta bisa: "mi edad a subi, mescos cu edad di Nansi, pero ainda mi ta mes vital cu Compa Nanzi."

Mañan na Biblioteca lo tin un homenaje na Olga Orman y sigur ta cu e sala lo ta completamente yen y tambe lo inaugura e bibliobus cu ilustracionnan nobo, di Biblioteca Nacional Arubano.

DIARIO. - (15 MEI 2008)